

**Naalackersuisut kingusinnerpaamik UPA2020-mi Kalaallit Peqqissartut  
Angerlarsimaffianni kalaaliminernik atuinerup qanoq iliorluni  
annertusineqarsinnaanera pillugu misissuineramik suliaqarnissaat pillugu Inatsisartuni  
aalajangiiffigisassatut siunnersuut. Misissuinermi - ajornanngippat - igaffissuarmi igaat  
kalaaliminersunninnerat qanoq ililluni annertunerulersinnaanera pillugu  
kaammattuuteqarfigineqassaaq.  
(Inatsisartunut ilaasortaq, *Stine Egedemit, Inuit Ataqtigiit, saqqummiunneqartog*)**

**pillugu**

**Ilaqtariinnermut Peqqissutsimullu Ataatsimiititaliap**

**siunnersuutip aappassaaneerpeqarneranut**

### **ISUMALIUTISSIISUTAA**

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq  
Inatsisartunut ilaasortaq Stine Egede, Inuit Ataqtigiit, siulittaasup tullia  
Inatsisartunut ilaasortaq Karl-Kristian Kruse, Siumut  
Inatsisartunut ilaasortaq Nivi Olsen, Demokraatit  
Inatsisartunut ilaasortaq Malene Vahl Rasmussen, Demokraatit  
Inatsisartunut ilaasortaq Mikivsuk Thomassen, Inuit Ataqtigiit  
Inatsisartunut ilaasortaq Aqqa Samuelsen, Inuit Ataqtigiit

UPA 2019-imi ulloq 15. maj 2019-imi siullermeerinninnerup kingorna ataatsimiititaliap siunnersuut sukumiisumik misissorpaa.

#### **1. Siunnersuutip imarisaa siunertaalu**

Kalaallit Peqqissartut Illuanni kalaaliminernik atuinerup qanoq iliorluni annertusineqarsinnaanera kingusinnerpaamik UPA 2020-imi misissorneqarnissaa siunnersuuteqartup kissaatigaa. Misissuinermi ajornanngippat igaffissuarmi igaat kalaaliminersunninnerat qanoq ililluni annertunerulersinnaanera ilanngullugu kaammattuuteqarfigineqartariaqarpoq.

## **2. Siunnersuutip Inatsisartunit siullermeerneqarnera**

Siunnersuummik siullermeerinermi akissuteqaammi allannguutissatut siunnersuummik Naalakkersuisut saqqummiussaqrput:

**Naalakkersuisut kingusinnerpaamik Inatsisartut upernaakkut ataatsimiinneranni 2020-mi Kalaallit Peqqissartut Angerlarsimaffianni kalaaliminernik atuinerup qanoq iliorluni annertusineqarsinnaanera najugaqartunullu igaat kalaalimersunninnerat qanoq ililluni annertunerulersinnaanera pillugu misissoreersimassagaat”**

Peqqissartut illuanni napparsimasut misigisartagaat pillugit aammalu peqqissartut illuanni Københavnimiittumi nerisanik sammisaqartussamik suleqatigiissitamik pilersitsisoqareersimasoq Naalakkersuisut akissuteqaamminni paasissutissiinerisa kingunerisaanik allannguutissatut siunnersuut saqqummiunneqarpoq.

Naalakkersuisut allannguutissatut siunnersuutaat Siumup tapersersorpaa, siunertarineqartumut siunnersuut akuersaartuummat.

Demokraatit misissuinissaq nukinnik atuiffiusussaammat nuannarinngilaat, eqqumaffigalugilli nerisassanik nunatsinneersunik annertunerusumik pitsaanerusumillu pilersuisinnaaneq qulakkeerumallugu amerlanerussuteqartut aqutugalugit isumaqatigiinniutigineqarsinnaasoq, tamanna naalakkersuinikkut pingaartinneqarsimappat.

Siunnersuuteqartup kissaatigisaatut misissuineramik suliaqartoqarnissaa Inuit Ataqtigiinnit tapersersorneqarpoq.

Partii Naleqqap misissuisoqarsinnaanera aamma tapersersorpaa, peqqissartulli illuannik atuisut pisariinnerusumik kalaaliminertorsinnaanerallu pillugu siunnerfilimmik Naalakkersuisut suliaqarnissaat ilanngullugu tapersersorlugu.

Tamanna tunngavigalugu siunnersuut sukumiinerusumik suliarineqartussanngorlugu Ilaqutariinnermut Peqqissutsimullu Ataatsimiititaliamut innersuunneqarpoq.

## **3. Ataatsimiititaliap siunnersuummik suliarinninnera**

Soorlu inuit assigiinngitsuusut, inuit ataasiakkaat pissutsit apeqqutaatillugit suut nererusunneruneraat assigiinneq ajorput, matumani, polikkikkut, inuussutissatigut peqqissutsigullu kiisalu nerisaqarniarluni aningaasatigut pissarititaasut ilanngullugit.

Nunatsinni inunngorsimasut peroriartortullu nerisassanik nerisassiornernillu ilitsoqqussaminnik immikkut pingaartitsisuupput, allalli nunatsinni inunngorsimasut peroriartortullu assigiinngitsuunik peqquteqarlutik allatoortunik nerisassanik imaluunniit



kalaaliminernik nerisassianik nunatsinneersuunngikkaluartunik nerisaqartartut.

Nerisassanik pissarsisinnaanerup Naalakkersuisunit qulakkeersimaneqartuarnissaa ataatsimiititaliamit naatsorsuutigineqarpoq.

Napparsimasut ilaquataasalu peqqissartut illuanniittut immikkut mianernartumik inissisimanerat ataatsimiititaliamit eqqumaffigineqarpoq. Taamaattumik immikkut nerisaqarnissamik kissaatigisaqarnerup naammassineqarnissaata sulissutiginerusariaqarnera ataatsimiititaliamit paasilluarneqarnissaavoq, tamannami namminermi ajornartoormi nuannaarutaasussaallunilu oqilisaataasussaammat.

Suliap ingerlanerani napparsimasunik peqqissartullu illuannik tusarniaanissaq qitiulluinnarpoq, taamaaliornikkut pingaartumik kalaalimerngit pillugit kissaatigisat sapinngisamik annertunerpaamik naammassineqarsinnaaqqullugit. Taamaattoq soorunami napparsimasut pineqarmata puigorneqassanngilaq, taamaattumik peqqissartut illuanni nerisassat sassaalliutigineqartartut eqqarsaatigalugit peqqinnissaqarfiup akisussaaffigaa, siullertut peqqinnissamut tunngasutigut sullissinermi napparsimasut imikkut pisariaqartitaat tulluarsarneqartussaallutik.

Peqqinnissamut tunngasutigut sullissinermi sinaakkusiussat iluini napparsimasut atugaat pitsaanerulersinneqarsinaapput, pitsaanerumik assigiinngiaarnerusunillu amerlanerusunik kalaaliminillertoqartalerpat, taamaaliortoqassappat nunatsinneersunik kalaaliminernik asseqanngitsunik amerlasuutigullu immikkullarissunik patajaatumik pilersuinissamut qulakkeerisumik sulinerup ingerlaqqinnissaanut ataatsimiititaliaq tamakkiisumik tapersersuivoq.

Peqqissartut illuanni nerisassioriaaseq ingerlaavartumik eqqumaffigineqartariaqartoq ilanngullugu ataatsimiititaliaq isumaqarpoq, tassungalu atatillugu ilisimasallit piginnaasaqartullu Kalaallit Nunaaneersunik kalaaliminernik mamarsarluortoqartarnissaanut peqataatinneqartariaqarput. Peqqissartut illuani sulisut kalaaliminernik iganissamut ilisimasaqarlualernissaannut pikkorissaanernut neqeroorfigineqarnissaat ingerlatsinissarlu ataatsimiititaliamit pissusissamisuuginnarsorineqarpoq.

Peqqissartut illuani najugaqarnermi napparsimasut atugaat sammisassaasalu ingerlaavartumik sammineqartuartaqarpoq, taamaaliornikkut aamma katsorsartinnerup ingerlanerani nukittorsarneqartuarsinnaaqqullugu.

#### **4. Siunnersuutip aningaasatigut kingunerisassai**


Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuummut tunngavilersuutitut allanneqassasut.

Misissuinissap 250.000 kr.-inik akeqarsinnaanera siunnersuummi allanneqarsimasoq ataatsimiititaliamit maluginiarneqarpoq. Tamanna ataatsimiititaliap tusaatissatut tiguaa.

### 5. Ataatsimiititaliap inassuteqaatai

**Tamanna tunngavigalugu Naalackersuisut allannguutissatut siunnersuutaat akuerineqassasoq siunnersuutillu allat itigartinneqassasut Ilaqutariinnermut Peqqissutsimullu Ataatsimiititaliap isumaqatigiittup inassutigaa.**

Taama oqaaseqarluni isumaliutissiisumilu allassimasunut paasinnilluni ataatsimiititaliap siunnersuut aappasaaniigassanngortippaa.



Laura Táunâjik  
Siulittaasoq



Stine Egede  
Siulittaasup tullia




Karl Kristian Kruse



Malene V. Rasmussen



Mikivuk Thomassen



Aqqa Samuelsen